

Ngoenzlaeng, Daegsoux caen bae hagdangz dahraix. Bouxsoujdou hawj de haeuj ndaw hagdangz bae. Yo, hagdangz ranzlaeuz moqsaksak, bangxiengz sij miz vahgawq boux hungmbwk, youh lengj youh yienhda. Veh miz haujlai fuk dozveh, miz bet max biubongh, Swhmaj Gvangh dub boemh gouq nyez daengj, fukfuk veh ndaej lumjlili. Daegsoux mienh byaij mienh yawj, gwh yawj gwh angq. De gag sing iq naeuz: “Baenzlai bi mbouj daeuj hagcoj lo, siengj mbouj daengz aen hag mbanj raeuz gaenq caeucq hagdangz ndawsingz mbouj ca saek di. Yaep he, Daegsoux heiz din daengz laj bungzcwci, raen miz aen geifonghaiz ndeu, gwnz de venj miz gaiq baiz sij naeuz: Bang saeseng fong haiz, mbouj aeu cienz! Daegsoux yawj le, doeksaetyat: Nanzdauh Hoz lauxsae ndaej hoengq bang saeseng guh saeh-ndei? Daegsoux youh menhmenh byaij



daengz henz laeng ranz bangunhsiz, yawj ndaw bae, raen yaucangj caeucq Hoz lauxsae geij vunz cingq gangj ndaej nauhyied. Daegsoux yawj ndaw bae, raen yaucangj dawz aen byuksaenq gig bongz ndeu, naeuz: “Hoz lauxsae, mwngz geij mbat naeuz mbouj aeu cienzhong, mbouj ndaej! Baezgonq soengq laeq lwghag din

goenq bae haw, dwg mwngz bang de gyau cienzyw, lij gyau 80 maenz cienz ringz, gou gig nanzgvaq. 3000 maenz cienzhong neix, mwngz itdingh aeu. Song ndwen lai daeuj, mwngz bang hagdangz veh sij gungh 60 ngoenzhong, ngoenz cij ndaej 50 maenz, mwngz mbouj aeu, couh yiemz siuj.”

“Ndi ndi, gou ndi yiemz siuj. Ndaej bang hagdangz cang gyauvanzging, dwg saeh bonjfaenh gou, mbouj wnggai aeu cienzhong. Sou nyengh bik gou aeu, couh dwg yawj mbouj hwnj gou. Gou bae ma lo!” Hoz lauxsae gangj sat, ndwn hwnjdaej couh siengj byaij. Boux doengzsae hendeu gipmuengz rag de naengh roengzdaej, unqswnh naeuz: “Mwngz

bang hagdangz veh sij, cibfaen sinhoj, cingsaenz ndei, cienzhong, mwngz wnggai aeu. Vahsug naeuz: Hag ndaej rox, gip ndaej hoj. Mwngz sij cih veh doz gig ak, dou nyengh doengz mwngz baenz rox, couh mbouj fanz mwngz lo. Ndigah, mwngz lijdwg sou cienzhong.” Yaucangj ciepdwk naeuz: “Gaej gangj baenzlai lo, sou cienzhong hwnjdaej. Daengz ngoenzneix, mwngz diuyouh rim 3 ndwen lo, hong veh sij hagdangz mwngz gaenq guh sat, daj ngoenzcog hwnj, mwngz youq ranz yietnaiq ba, ndaej hoengq daeuj hagdangz guhcaemz.” Hoz lauxsae naeuz: “Ndi aeu, ndi aeu, gou baema lo.”

Daegsoux raen yienghneix, aek diuqdubdub, ca di heuh oksing daeuj: Ha, Hoz lauxsae rim 60 bi la? Gij yawjap gou cungj loek liux lo. Hoz lauxsae ha, gou doiq mbouj hwnj mwngz, luenh ngeiz mwngz lo, lwgda gou vaih lo. Hai, vaiq dauqbae, youq giuzgungj caj, cingj Hoz lauxsae gwn haeux. Daegsoux dwk soujgih hawj boux gai gaeq dawz duz gaeq iem hung ndeu daeuj……Daegsoux gikdoengh ndaej raemxda rim gvaengz, de ruzrangh byaij ok hagdangz, gwh mohdoz coh baih giuzgungj bongh gvaqbae.

(sat)

Ciengz Geiq Aencingz Dangj

常记党恩情

□Sub Dasineh 烁大星

Gomoegminz hai va
Hoengz doh bya doh doengh
Va gyaundeidei gvaq gyoengq
Ndingloengloeng maez vunz

Naeuz gangmeij yenzcauz
Loz Swnggyau vutmingh
Lezsw Mauz An'yingh
Hoenx hingz baih daeuj ciemq

Valeux va yinghyungz
Eiqseiq hung youh laeg
Miz minzczuz daegsaek
Yawjraen ngaekgyaeuj gingq

Lezsw gijnenbeih
Geiq yinghleiz goenglauz
Vih gouq guek ndok hau
Goenglauz lwenq fanh daih

Seiz ndaw guek gwzming
Okmingz dwg Gyanghcej
Liuz Huzlanz dem le
Vutmingh de(deng) yinghyungz

Cingmingz raeuz dwkmoh
Coh lezsw soengq va
Hagseng baenzdoih ma
Soengq va caez ngaemgyaeuj

Seiz dingj fangz Yizbwnj
Hwnj cancangz guh bing
Bingzyingzgvanh hoenx hingz
Yinghyungz fanhfanh cien

Cunghvaz meijdwz ndei
Geiq cojcoeng aencingz
Gyaez guek raeuz miz cingz
Guh vunz dingh gamjaen

Baez gaijfang cancwngh
Hwng lumj ndit lumj feiz
Vunzdig dai dekmbei
Lezsw cei q miznaj

Dwkmoh raeuz ngeix daengz
Baengh dangj gwndaen ndei
Ndaej daeuj mbouj yungzheih
Ciengz geiq aencingz dangj



Mbanjranz Gyaundeidei

Veiz Gozcingh Sangcieng Cawj-guenj Guengjsae Ngeihcib Bi

韦国清上将主政广西二十年

□Hoz Saubangj sij Cinz Siengzcouh Liuz Gingliuj Cinz Siengzgen hoiz

Lizsij gaenq cingqmingz, gij cawjcieng Veiz Gozcingh daengj vunz bihaenx doiq hwnjguh Giuzhung Yunghgyangh haenx, yawj ndaej haemq gyae.

Aengiuz neix bi 1959 hwnjmax, caeucq guekgya yaek guh Namzningz Feihgihciengz moq doxlien ndaej maenhwdwd. Bi 1958 Hoih Namzningz hai sat le, gozvuyen gietdingh yaek guh aen Namzningz Feihgihciengz moq. Youz minzhangz, gunghginh, swcigih caeucq Namzningz Si gyoebbaenz aen cujguh hong, gonq-laeng bae gaujcaz le Vujmingz, Suhluiz, Wdangz, Sihyanghdangz, Vuzhih, Ndoisienseng daengj 6 aen dieg, doeklaeng genjdingh aen dieg youq Vuzhih, Vuzhih youq haenznamz Dahyunghgyangh, liz ndawsingz 30 lai goengleix. Dingh ciengzfeihgih moq youq Vuzhih, couh miz gvaq dah aen vwndiz neix. Yienghneix,

swcigih daezok yaek guh Giuzhung Yunghgyangh cix swnhleix baenzcieng lo, haemq vaiq cix ndaej Guekgya Giveij baecinj.

Bi 1960, sojmiz gij doengiuz, gij daizgiuz song gyaeuj caeucq aen gwnzgiuz he gaenq guh baenz, hoeng aenvih guekgya bungq deng haemzhoj ginghei, deng bik vuenjguh. Seiz-haenx, miz vunz cawjcieng cek gij gangcaiz gwnz giuz roengzdaej, dawz bae bang nungz, Veiz Gozcingh mbouj doengzeiq.

Bi 1962 ndwen 11, riengz Namzningz Feihgihciengz daj dieg-gaeucq senj daengz diegmoq doenghangz le, lienzdaemh guh Giuzhung Yunghgyangh youh ndaej dauqcungz daez hwnj yizcwngz bae.

Ciuq gij yigen Veiz Gozcingh, swcigih guh le baugau ciendaez hawj Guekgya Giveij caeucq Cunghnanzgiz Giveij, gangjmingz Giuzhung Yanggyangh dwg diuz giuz doxlien song haenz ndawsingz Namzningz haenx, dwg diuz roen cujyau daj Namzningz

doeng coh roengoek goengloh reguek doeng Yeznanz caeucq doeng coh Ginhcouh, Bwzhaij daengj goengloh dieghenzhaij haenx. Daegbied dwg feihgihcangz moq guh baenz doenghangz le, gij ci, vunz siengj doh dah haenx demlai ndaej gig haenq. Aenvih ruz doz seizgan nanz lai, yiemzcungq yingyangj le guh hong caeucq dajyinh. Ndigah, cingjgouz anbaiz laebdaeb guh Giuzhung Yunghgyangh.

(caengz sat)